

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 410734 21 St
Tuzla, 25.01.2022. godine

OPĆINSKI SUD U TUZLI, sudija Arnaut Faruk, u postupku predhodnog ispitivanja prijedloga za otvaranje stečajnog postupka nad dužnikom „**HIZRA ISA COMMERCE**“ **d.o.o. za transport, promet i usluge, export import Kalesija, Carska bašta bb**, zastupanog po punomoćniku Pašćanović Enveru, advokatu iz Kalesije, dana 25.01.2022. godine donio je slijedeće,

R J E Š E N J E

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom privrednog društva „**HIZRA ISA COMMERCE**“ **d.o.o. za transport, promet i usluge, export import Kalesija, Carska bašta bb**.

Za privremenog stečajnog upravnika imenuje Almir Bajrić iz Tuzle.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju, a naročito:

- **obezbijediti imovinu dužnika i starati se o istoj,**
- **ima ovlašćenja da uđe u poslovne prostorije dužnik i provede neophodne radnje,**
- **utvrditi da li postoji razlog za otvaranje stečajnog postupka,**
- **ispitati da li će imovina stečajnog dužnika pokriti troškove stečajnog postupka,**
- **utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i**
- **uraditi kontrolu poslovanja stečajnog dužnika.**
- **kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.**

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za

otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama FBiH“, web stranici Općinskog suda u Tuzli i na Internet stranici FIA-e, te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Kalesiji i Službi za geodetske i imovinsko-pravne poslove Općine Kalesija, radi upisa zabilježbe otvaranja prethodnog postupka.

O b r a z l o ž e n j e

Predlagač „HIZRA ISA COMMERCE“ d.o.o. za transport, promet i usluge, export import Kalesija kao dužnik, putem punomoćnika Envera Paščanovića advokata iz Kalesije podnio je dana 11.10.2022. godine ovom sudu prijedlog za otvaranje stečajnog postupka nad ovim privrednim društvom, zbog platežne nesposobnosti stečajnog dužnika.

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagača u smislu odredbe člana 58. stav 1. i 2. Zakona o stečaju i da je isti dopušten, dana 13.01.2022. godine, naložio je predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka.

Predlagač „HIZRA ISA COMMERCE“ d.o.o. za transport, promet i usluge, export import Kalesija je dana 24.01.2022. godine dostavio sudu dokaz o uplati predujmljenih sredstava za finansiranje prethodnog postupka u iznosu od 3.000,00 KM.

Na osnovu priložene dokumentacije i to: Potvrda Unicredit banke od 07.10.2021. godine, Uvjerenje UIO RC Tuzla broj 02/6/IV-16-11-90-8085-1 od 05.11.2021. godine, Uvjerenje PU KPU Tuzla PI Kalesija broj 13-3/10-12-5-7497/2021 od 03.12.2021. godine, Aktuelni izvod iz sudskog registra od 22.12.2021. godine, Odluka o prestanku rada društva i pokretanju stečajnog postupka broj 1/21 od 05.10.2021. godine, Bilans stanja na dan 02.11.2021. godine, ovjeren kod FIA 27.05.2008. godine, Bilans uspjeha za period 01.01. do 31.12.2006. godine ovjeren kod FIA 27.05.2008. godine, Bilans stanja na dan 02.11.2021. godine, Bilans uspjeha za period 01.01.2021.-02.11.2021. godine, Dostava podataka Općinskog suda u Tuzli broj 032-0-RegZ-21-003775 od 30.11.2021. godine, predlagač je učinio vjerovatnim platežnu nesposobnost.

Na ročištu za saslušanje stečajnog dužnika održanog dana 13.01.2022. godine, punomoćnik predlagača Enver Paščanović advokat iz Kalesije izjavio je da u cijelosti ostaje kod prijedloga za otvaranje stečajnog postupka nad imovinom društva „HIZRA ISA

COMMERCE` d.o.o. za transport, promet i usluge, export import Kalesija, navodeći iz razloga što ne postoje dalji ekonomski uvjeti za rad društva zbog nesolventnosti. U pogledu prezaduženosti društva zakonski zastupnik navodi da je u spis dostavio Uvjerenje PU KPU Tuzla na ime plaćanja poreznih obaveza u iznosu od 74.578,82KM. Kako je naveo, račun društva je u blokadi. Koliko mu je poznato društvo nema obaveza prema dobavljačima, prema drugim pravnim i fizičkim licima. U pogledu imovine društvo koliko mu je poznato u ovom momentu društvo ne posjeduje pokretnu ili nepokretnu imovine, te da nema potraživanja prema drugim pravnim ili fizičkim licima.

Na osnovu podnesene dokumentacije i zakonskog zastupnika stečajnog dužnika, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju („Sl. novine F BiH“, br.53/2021.).

Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

SUDIJA
Faruk Arnaut

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, računajući od petog dana od dana objavljivanja u „Sl. Novinama FBiH“ . Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu putem ovog Suda.